



Staderas, tranter Flem e Laax, enturn 1930.



Spazzachamin a Falera, enturn 1965.

FOTO V. SCHNELLER GEIGER



Sper Flem Casa d'uaul, enturn 1930.

FOTO J. GEIGER

# Bun success cun veglias fotografias da Flem

## Cartas da Nadal e da cuntradas da naiv dal fotograf Jules Geiger

■ (anr/vi) **Gion Schneller ha gi in bun nas. El è il schef da la photoglob SA a Turitg. Sia fatschenta ha vendi quest enviern ina seria da cartas da Nadal. Cunzunt las veglias fotografias da Flem èn stadas in success.** En ils uffizis da posta pon ins ozendi cumprar cartas da gratulaziun, da malencurada u da Nadal. La photoglob SA furnescha talas cartas als uffizis da posta, ma era a kiosks ed a fatschentas. *Gion Schneller* che viva a Flem e

lavura a Turitg, è in dals manaders da la photoglob SA. Gia il tat da Schneller, Jules Geiger, era en questa branscha. Geiger era fotograf e possedeava ina fatschenta a Flem.

### Ord l'archiv dal tat

En l'archiv dal tat ha Gion Schneller chattà fotografias cun bellezza cuntradas da naiv. Intginas da questas fotografias ha la photoglob uss duvrà per sia seria da Nadal e d'enviern.

I sa tracta d'ina seria da ventg cartas, declera Schneller: Sis cartas en nair ed alv, diesch cartas en color e quatter cartas nostalgicas.

Da las cartas en nair ed alv èn las bleras da Jules Geiger. Sper las cuntradas da naiv hai era in purtret d'in spazzachamin a Falera. In'otra fotografia mussa ina sautunza sin il glatsch da Flem. Quests dus maletgs haja sia mamma, Vrony Schneller-Geiger, fatg

enturn ils onns 1960 e 1965, declera Schneller

Tranter las fotografias nostalgicas sa chatta er in maletg cun trais uffants ch'èn postads avant il pignol da Nadal. «Quels trais uffants essan nus, mias duas soras ed jau», di Schneller.

### Nadal 2005 datti forse puspè cartas da Flem

Per la proxima stagiun da Nadal vegnia

la photoglob probabel puspè a distribuir las fotografias dal tat Jules Geiger, di Schneller. Ord la seria da ventg cartas hajan ils maletgs da Flem gi il pli grond success.

Quantas cartas ch'èn vegnidas vendidas, po Schneller dentant anc betg dir exact. Ils uffizis da posta, ils kiosks e las fatschentas tramettian pir uss enavos las cartas ch'èn restadas enavos suenter la vendita da Nadal.